


鄉土志叢編

張國淦署





欒

鄉

編

土



石心

志

鄉土志叢編例言

鄉土志爲研究地方自治必要之書遜清預備立憲敕各縣從速編纂而印成流布者不過百數十種其餘或僅謄真或爲稿底塵封於衙署檔度之間改革以來多所散佚本館廣事搜集得有數十種不敢自私自次第付梓公諸同好定名鄉土志叢編述例如左

一 本編依各志原稿付印凡分門別類及一切體例均仍其舊以覘各縣當時之風尙

一 原稿中「國朝」「朝廷」「諭旨」「天恩」「賜」「敕」等字另行雙擡或單擡者本編僅爲空一格又地名或學校廟宇等原稿有另提一行者本編亦僅爲空一格以節省篇幅

一 原稿有前後體例參差者以前數葉之體例爲標準改歸一律

一 各志原稿本格式字蹟大小不一每葉行數每行字數亦多寡不同本編既

合爲一書每半葉十三行每行排四號字者均三十一字排五號字者均四十一字

一 原稿有雙行注文者本編改用五號字單行以期清朗

一 各志原稿多無目錄本編每種增訂分目每集另編總目以便檢閱

一 本編先出陝西十種其餘繼續出版不限種數

一 本編惟據原稿校對未暇參校他書倘有錯誤幸鑒正之

中華民國二十六年二月燕京大學圖書館

鄉土志叢編第一集目錄

陝西省

鄠縣鄉土志

上卷

本境

歷史

政績錄

兵事錄

中卷

耆舊錄

孝友

義行

名宦祠

鄉賢祠

節烈祠

人類

戶口

氏族

宗教

實業

下卷

地理

山水

道路

物產

商務

甘泉縣鄉土志

歷史

政績錄

兵事錄

耆舊錄

人類

戶口

氏族

宗教

實業

地理

山水

道路 物產 商務

宜川鄉土志

星野

沿革

疆域

城池

山川

里甲

古蹟

勝景

風俗

岐山縣鄉土志

卷一

歷史

政績錄

兵事錄

卷二

耆舊錄

卷三

人類

戶口

氏族 宗教 實業

地理

古蹟

祠廟

坊表

橋梁

市鎮

學堂

山水

道路

物產

商務

城固縣鄉土志

歷史

建置沿革附表

政績錄

兵事錄

耆舊錄

附名宦

鄉賢

忠義

節烈

人類

戶口

氏族 宗教 實業

地理

附古蹟

祠廟

坊表

橋梁

市鎮

山水

道路

物產

商務

寧羌州鄉土志

歷史

建置沿革

政績錄

兵事錄

耆舊錄

節烈

人類

戶口

氏族

宗教

實業

地理 境界 區劃 山脉 水誌 道路 物產 商務

神木郷土志

卷一 天文 地理 山川 邊外屬地疆域 邊外屬地山川 營造 封爵

卷二

職官 賞賦 學校 祠祀 選舉 封廢 兵防 卷三 軍事 郵政 水利 鹽法 茶政 物產

卷四 風俗 祥異 名宦 人物 陵墓 古蹟 經籍 金石 藝文 拾遺 志異

朝邑縣郷土志

沿革表 政績錄 兵事錄 耆舊錄 人類 戶口 氏族 宗教 實業 地理 山水

道路 物產 商務

華州郷土志

政績 兵事 耆舊 人類 戶口 宗教 實業 地理 物產 商務

中部縣郷土志

建置 歷史 政績錄 兵事 耆舊 人類 戶口 氏族 宗教 實業 地理 寺觀

山水 道路 物產 商務

鄂縣鄉土志目錄

上卷

本境

歷史

政績錄

兵事錄

中卷

耆舊錄

孝友

義行

名宦祠

鄉賢祠

一一一
一一一
一〇
八
一
七
二
一
一

節烈祠

人類

戶口

氏族

宗教

實業

下卷

地理

山

水

道路

物產

商務

一一

一三

一三

一三

一五

一六

一

四

五

五

六

七

鄆縣鄉土志上

本境

鄆縣 漢書戶扈鄆三字同昔少昊氏以烏紀官有五雉九扈扈農正也古人食邑即以邑氏鄆之封其來遠矣

歷史

古崇國 連山易云鯀封於崇鯀禹父國語謂之崇伯輿地志鄆縣古崇國今縣北有三過村乃大禹三過其門而不入遺趾

夏有扈國 尙書啟與有扈大戰於甘

商仍爲崇國 見通考蓋鯀殛之後崇復爲扈商伐夏又以扈爲崇鯀

周豐宮 豐即今之秦渡鎮在縣治東三十里史記崇侯虎譖西伯囚於羑里得放歸伐崇作豐詩曰旣

伐於崇作邑於豐朱傳崇國在鄆縣伐崇之後遷都於豐武王遷鎬豐宮不移每大事皆步至宗周書曰

王來至商至於豐是也

春秋時爲鄠國 左傳鄠文之昭也杜注在鄠縣東

戰國時亦稱有扈氏 吳子圖國篇云有扈氏君恃衆好勇以喪社稷

秦改扈爲鄠屬內史地 史記平王以岐豐之地賜秦襄公按岐即今岐山縣豐在今鄠縣秦一天

下內史兼治三輔

漢始置鄠縣屬右扶風 漢書地理志右扶風故秦內史高帝九年復罷爲內史武帝建元六年分

爲右內史太初元年更爲右扶風鄠縣屬焉

後漢屬司隸校尉部右扶風

魏置雍州三輔仍屬司隸部

晉鄠縣統於始平郡 泰始三年置

後魏分爲雍州屬京兆郡 太平眞君七年置即今北三里鄠縣故城是

西魏屬雍州京兆尹

北周仍屬京兆尹

隋屬京兆郡 大業十年改今治

唐分天下爲十道鄠屬關內道京兆府京兆郡

宋屬永興軍路京兆府京兆郡

金改永興路爲京兆路鄠屬京兆路京兆府

元改京兆路爲安西路又改安西爲奉元路置陝西行中書省奉元路錄事司鄠縣屬焉

明屬陝西布政司西安府

國朝因之

政績錄 官鄠者多矣而政績之可紀者則自漢始以前非無名宦也以無文獻之可徵也由漢以

迄於今上下三千年其可紀者僅有此數十人耳則其缺略亦多矣要之撫字心勞幹濟才優婦孺頌其德口碑歌其功者必不至湮沒也官斯土者可以惕然省矣

漢

何武 字君公蜀郡郫縣人以射策爲郎遷鄠令爲人仁厚好獎士類樂道人之善世以此多之所居無赫赫名去後嘗見思官至京兆尹王莽欲篡漢陰誅不附己者武自殺人多冤之

唐

蘇珣 藍田人。中明經第。調鄆尉。鄆多訟者。日至長史府。珣決明辨。長史李義琰異之。指廳事曰。此公座也。仕至戶部尙書。封河南郡公。致仕。卒年八十一。諡曰文。

裴子餘 絳州稷山人。中明經補鄆尉。同舍李朝隱。程行誡。以文法稱。而子餘以儒顯。或問優劣於長史。陳崇業答曰。菊蘭異芬。胡有廢者。幼事繼母。以孝聞。諡曰孝子。餘居官清家。闈友愛兄弟。三人皆有志行云。

盧奕 黃門監懷慎子。天寶初。令鄆所治。輒最積功。擢給事中。拜御史中丞。自懷慎。免及奕。三居其官。清節似之時。傳其美。後殉祿山之難。贈禮部尙書。諡曰貞烈。

李巽 字令叔。趙州贊皇人。舉拔萃。授鄆尉。天資長於吏事。至治家。亦旬檢案牘簿書。如公府吏。有過秋毫。無縱最工。心計爲鹽鐵轉運使。一年較劉晏所入最多。之年。同明年過之。卒。贈尙書右僕射。

韋應物 京兆長安人。大歷十四年爲鄆令。性高潔。鮮食寡欲。所居掃地焚香。治以清淨。爲詩馳驟建安。後歷蘇州著詩十卷。

鄭羣 字宏之。滎陽人。以進士爲鄆尉。拜監察御史。治官守身極謹。不掛於過去官。而人民思之。見韓昌黎。

文集

沈傳師

字子言蘇州吳人貞元末舉進士後登制科爲鄆尉以廉靜聞仕終吏部侍郎

崔發

貝州武城人敬宗時爲鄆令聞五坊人毆百姓命擒之入曳於庭詰之乃中使也上怒收發繫臺獄

遇救釋

宋

陳希亮字公弼其先京兆人唐廣明中遷眉州青神之東山幼孤好學中天聖八年進士初爲大理評

事後徙知鄆縣老吏曹腆侮法以希亮年少易之希亮視事首得其罪腆叩頭出血願自新亮戒而捨之

卒爲善吏有巫覡斂財祭鬼謂之春齋否則有火災民間訛言有緋衣三老人行火希亮禁之民不敢犯

火亦不行毀淫祠數百區勒巫爲農者七十餘家及去官父老送之曰公去我緋衣老人復來矣

程顥

河南人學者稱明道先生嘉祐間舉進士調主鄆簿令以其年少易之鄆民有借兄宅居者得瘞錢

兄之子訴曰父所藏也令以無證難決先生曰此易辨也問曰爾父藏錢何時曰四十年彼借何時曰二

十年取錢視之謂訴者曰今官所鑄錢五六年即徧天下此錢皆未藏前數十年所鑄何也其人不能答

遂服令大奇之有稅官以賄聞怙力自謂能殺人衆皆憚之聞先生至其人先爲言曰人謂某盜官錢新

簿將發之某勢窮必殺人先生笑曰足下食君之祿詎肯盜錢萬一有之將自救不暇何能殺人其人默不敢言償所盜錢卒以善去南山僧舍有石佛歲傳其首放光遠近男女聚觀令不敢禁先生戒寺僧曰俟復見必先自吾職事不能往當取其首就觀之自是不復有光府境水害倉卒興役又盛暑疫行死者甚衆獨先生所部飲食菱舍無不安使人不勞而事集嘗謂人曰吾之董役乃治軍法也當路者欲薦之多問所欲先生曰薦士當以才之所堪不當問所欲後哲宗召爲宗正丞未行卒諡曰純公從祀孔子廟庭

張伋

宣和元年來知鄞管勾勸農公事兼兵馬監押作空翠堂自爲記

李宗

大梁人舉進士爲鄞簿有政聲後知慶陽

金

楊達夫

字晉卿三原進士主鄞縣簿事一從簡吏民樂之

劉君

失其名彭城人大定二十二年以壽州酒使來知鄞多善政見修城記

元

察的兒

爲鄞達魯花赤蒞政十二年政平訟理境產嘉禾瑞麥縣刻石爲圖

寇靖 字伯衡由進士爲鄆令興學勸農懇懇教化不尙威刑與平路當衝要整厓協濟不足欲引鄆分代之君乃詣府爭之曰鄆地狹民寡已割四鄉之一畀整厓矣今又嫁重負於鄆民將不堪命遂得仍舊澧水歲潰堤壞民田府檄役千人藁捷稱是吏緣爲奸君程其工止發三百人器用半之事治而民不擾時諸官府田租石當楮繙五十實贏市值什四五公言國家立法之意謂地遠艱輸者折色寬民力也今執是例取之豈爲民父母之道哉終其任取租不計繕旣去民思之爲勒碑頌德焉

明

許訴 開封舉人洪武中知鄆縣蒞政以勤撫民以惠興學校修廨宇措置均宜民到于今稱之

徐純 字德善灃州人正統中知鄆縣刑清訟簡興學愛民諸官署並城隍廟皆其葺理

張億 知鄆縣嘗夜出微行民間婦姑紡績姑遣婦視所釀酒婦視之對曰有如張縣君澈底清矣億聞之喜翼日以木棉勞之

周儀 孝義舉人爲鄆教諭與諸生約雞鳴從事乃先起衣冠而俟比諸生背誦書史畢甫寅卯耳由是諸生多淵博邑民有事於城隍廟聲伎繁艷觀者塞途諸生無一敢延頸者則其教可知矣

程鵬 解州進士正德中知鄆縣和厚坦易居常無怒亦未嘗過用刑威人以此德之方聽訟頃有欲平者

聽之累遷刑部郎中

王文秀 閬中人樸茂質實遇事勤懇若理家然

康天爵 字汝修以進士知鄆縣治以安養百姓爲主不窮治詞訟隸不敢下鄉凡修建木物取諸佛老之宮用力役亦少素有廉慎之節人或以爲過激然實非他人所能也故至今有去後之思焉

楊祐 內江進士以郎中謫知鄆縣學識深純氣質端粹凡事精練後至少卿

宋廷琦 城武舉人有清操惠政民受其福學亦蘊藉淵深尤精詞翰士民爲之建祠

賈希周 彰德舉人剖決如流民接於目輒識姓名不忘人敬而畏之

陳邦瑞 孟津舉人剛明果斷百姓帖服不敢輕犯法焉

王瑋 永甯舉人愛養百姓丕振儒風

李守經 濮州舉人法嚴令行治小人尤嚴

馬呈圖 字道甫蜀內江舉人隆慶中令鄆性剛果諳於治體動中機宜申免瀚河役夫節省里中冗費

吏畏民懷政聲藉甚考最將以科道用適平涼鎮原逋負民梗難治加平涼府同知銜管理縣事鄆民間之聚衆數百訴於當道當道以事難遽挽竟遷去去鄆三載民思其德欲建生祠請於當道當道以其得

民許之咸甯王太宰用寶爲之記時萬曆七年己卯三月也

馬廷驊 孝義舉人悃悞無華平易近人民方賴其休養尋以疾卒

李本盛 解州舉人割斷無難節省有法民受和平之福

賈待價 商邱舉人精敏老練遇事敢爲至條鞭法尤力主其事

延論 平定州進士歲旱精誠祈禱賑貸饑民全活甚衆

王九皋 濮州舉人萬曆丙申洩任繼王太史修志而太史原板至此失傳矣惜哉

呂仲信 唐縣舉人引檀谷阜谷及阿福泉諸水逕縣東關北折而西入於澗人謂之呂公河

王宣 字君召河南武陟舉人萬曆辛丑蒞任爲人沉靜丰姿屹然人不可干以私邑中諸廢墜舉修之若

家督之于家焉條鞭法行前令互有紕繆公請比廩爲折色夏秋二稅驛站均徭一切通融派徵議上監司咸報可因著爲則焉邑有李某家温厚爲偷之長前後發贓以千數計然輒發輒已及發在公公薄下數杖意若不省乃布方略游卒出諸偷皆緣手獲而李亦前諸偷死盜風爲之一息甲辰歲饑會城圯請以工代賑由是邑有百雉之雄民無轉死之苦織局之設諸邑歲有額辦公按諸里常平倉頗有餘儲則爲關白以其餘充賦鄆傍南山薪炭灰本及他物公府歲下鄆取辦民受其惠因善爲調停無苟阿承民

承民得弛其負擔先時獄囚或不時省決致有冤濫公俱讞決不待時所決無恨其催科勾攝一切濫粟俱不得行士民深感其德爲立生祠後陞冀州知州邑人韓進士期維爲撰德政碑

呂大章 安邑選貢時盤屋與鄆爭澇利相訟於當道大章據理力請澇遂得永爲鄆利至今士民頌之

白應輝 江津舉人蒞任不以家屬從越四載囊橐蕭然計擒回賊沙倉等十一名有奇功士民爲之建祠有德政碑河臺碑又有鳴琴異績卷俘盜圖紀循良政績冊及平獄謠驅蝗頌遷雲南蒙化府同知

劉璞 字柘山莒州舉人萬歷乙巳知鄆縣是歲鄆自四月至七月不雨璞至承施粥之檄即捐粟五百石爲倡於是王輔世等輸粟一千五百有奇民得全活先是回賊倡亂盤屋白龍溝鄆之龐家村聲勢相應前令捕沙倉等寘於法而探囊穿窬之輩尙多璞爲連環保甲法每保壯丁二十人教師一人每月三日教習餘日歸農復舉社學教民間子弟又以社倉原額五千六百有奇穀麥兼備貯穀猶易貯麥爲難循行區畫刊爲條例犂然修舉著鄆志兼四事豹班

張宗孟 字泗源山西定襄進士授鄆令以乙亥二月蒞任未蒞任時賊薄城下宗孟開警兼程而進至則四門皆土壘遂野服從間道登陴鼓勵守者賊宵遁乃治鄆城四隅建敵樓重葺四門剏懸樓二十四座建堡六十六處設火具賊過城下輒相戒毋犯又建市中心樓重修大成殿移泮池櫺星門外居恒與人

語煦煦可親而階庭肅穆吏胥奔走無錯趾諸臺橫有徵調即拒不應左帥兵過處俱入城宗孟之一切供億置城外局其門因誣譖於督院上其事奉旨勘問士民保留乃以降級攝令事後官至按察司僉事

國朝

魏似韓 字雲卿山東萊蕪進士廉潔精勤愛民如子課士如師重修明倫堂凡事持大體有古循吏風
尋陞工部屯田司主事

趙之璧 浙江慈谿舉人秉性和平遇事裁決如流尤長於詩文所著有偶存集風流蘊藉仙吏才也以不善事當道去士民惜之

馬光遠 山東大嵩衛進士精明剛斷人不敢干以鄂私有巨奸數人立斃杖下法紀肅然甫數月緣前
任事去惜哉

劉文燦 遼東開元舉人精敏明決捐俸修太史橋民不病涉丁外艱去

曹爾弼 山西陵川廕生老成練達善於因事就功時軍需旁午飲酒賦詩裕如也捐俸百金重修大成
殿陞內閣中書舍人

康如璉 山西安邑進士蒞任瀛黔用兵供應如雲事皆辦治而人不擾以其暇重續邑志科目中優吏

才者以丁內艱去

金廷襄

字應枚廣甯貢士蒞任年甚少精敏爽直姦宄望而畏之豪強亦因之斂蹤其時甫經大荒捐

囊辦治牛種爲百姓開墾荒田酌劑徵收嚴禁妄訴及戲樂賭博以與民休息丁父艱去至今邑人思之

朱文卿

字亞翁直隸懷來進士忠厚慈祥非法不爲歷七年從無不信之言漢史所謂安靜之吏悃悞

無華日計不足月計有餘者其禁絕孤魂淫祀尤爲特著丰采云

張世勳

江南蕪湖例貢凡事因俗而治吏民安之性喜文史善行書楷法令中爲崇尚風雅者捐俸重

修澇水石橋尤爲遺惠云

吳廷芝

字卉長福建永定舉人學問淹博善書法接紳士有禮臨民以寬剏建魁星樓於城東南隅重

修櫺星門以石易木最留心於邑之文風者

靳樹榛

鑲黃旗漢軍由例監効力康熙六十年蒞任敦重寡言精於吏治而弭盜禁賭執法尤嚴竊賊

皆指鄣相戒曰靳家庄勿輕犯也遂望風遠遁民賴以安幾於夜不閉戶

趙爾楷

直隸西甯進士廉明剛直不諛上不徇情折獄如神健訟及豪惡望而斂跡胥吏無一敢滋弊

者征科寬而百姓爭輸辦軍需未嘗以絲毫累民有守有爲無愧循良六年以丁憂歸

王樓堂 字植三河南柘城附生以保舉孝廉蒞任下車之始即革去積年縣役大累歲杪預放倉糧接濟貧民甘受參罰秋大旱躬禱深山甘霖沛應素以愛民爲心故多善政

李文漢 字上昭江西金谿人內閣供事以軍功保舉除知鄒縣吏治精敏勤於修理如文廟大成殿崇聖祠名宦鄉賢二祠大觀樓雲路坊北城樓西河亭澇河兩堤諸興作皆是又於市集革前小斗陰弊仍用大斗窮民便之

舒其紳 字佩斯直隸任邱增生廉明慈惠才學兼優剏明道書院自爲記慨然有培士風深意邑中數失火剏修火神廟弭災調署興安州再調咸陽士民以未得久沾其澤攀轅難立去思碑至今過碑者多下拜

宋澤 字潤生山西嚳縣進士清廉慈惠御衆以寬尤留心學校每於書院課士文必批評盡致卒於任不能歸葬士民齎資送之至今猶有宋青天之稱云

陳文猷 字勉亭湖南人以留壩同知調署鄆令爲人忠厚好獎士類添建書院齋房十餘所方之古來循良庶幾無愧焉後卒於留壩本任留壩士民稟請 上憲奏入國史循吏傳

胡海章 字禹門四川成都舉人光緒庚辰署鄆廉靜慈祥決獄如神吏畏其威畏懷其惠鄉里之峻訟

者頓息署任一載善政畢舉一時有胡青天之稱邑人頌其德政曰弊絕風清至今咸有去後之思焉
劉聲琦 字少芸四川中江縣人光緒己卯舉人庚寅令鄆清潔自操於凡興利除弊之事無不躬親相
度值太史橋傾圮醜資重修事竣而民不擾發奸摘伏民無冤枉尤加惠士林捐廉數百金置經史諸子
之書且爲增膏火之額寒峻於今食德云

劉璋毓 字琨秀湖南人光緒戊戌署鄆視民如子見不仁者搏擊之如鷹鷂之逐鳥雀也一時惡少相
戒不敢犯法焉值秋淫雨爲災太平河水溢傷民房屋禾稼甚多公躬親查災捐廉賑卹減僕從罷徭役
以蘇民困書院學租日久迷失躬親查究一無遺漏捐百餘金以益學堂膏火邑人士歌功頌德未艾也

兵事錄

天地之道治極則生亂亂極則思治一治一亂皆兵之由是以先王耀德不觀兵亦未嘗

諱言兵也鄆邑自教匪倡亂以後回匪髮捻相繼蹂躪生民塗炭極矣痛定思痛尙其爲
未雨之綢繆乎

有扈氏威侮五行怠棄三正啓伐之大戰於甘 孔傳甘有扈南郊蔡傳甘在今扶風鄆縣

文王伐崇作邑於豐 鄆古崇伯國商時崇侯虎譜西北於紂囚之羗里後得釋三年伐崇作邑於豐

即今縣東三十里秦渡鎮

春秋僖公十有五年冬十月晉侯及秦伯戰於韓獲晉侯左傳秦獲晉侯以歸乃

舍靈臺

杜注靈臺在京兆鄠縣所以格絕令不得通內外

光武建始二年赤眉引兵而西最爲猛厲衆號百萬自終南山轉掠城邑

見劉盆子

傳

魏志建安二十二年以淵行護軍將軍督朱靈路招等擊破終南山賊劉雄降其

衆 見夏侯淵傳

晉懷帝永嘉元年劉曜旣據長安與賈疋麴允諸軍戰曜衆大敗退保甘渠

即甘

水雍大記甘水出鄠縣南甘谷按甘谷舊爲鄠地今已割入盩厔故後山水不載

魏書陸真傳高宗和平中咸陽民趙受昌劉彧自署龍驤將軍煽動鄠盩二縣聚衆數百人擾赤谷以叛真與雍州刺史劉邈討平之

通鑑綱目柴紹將赴太原謂其妻李氏曰尊公舉兵欲偕行則不可留此則及禍奈何李氏曰君第速行我一婦人易以潛匿當自爲計紹遂行李氏歸鄠縣別墅散家貲聚徒衆淵從弟神通亦在長安亡入鄠縣山中與長安大俠史萬寶等起

兵以應淵西域商何潘仁入司竹園爲盜有衆數萬劫李綱爲長史李氏使其奴馬三寶說潘仁與之就神通合勢攻鄆縣下之神通衆逾一萬以令狐德棻爲記室李氏又使馬三寶說羣盜皆師衆從之徇盤屋武功始平皆下之衆至七萬右親衛段綸娶淵女亦聚衆於藍田將萬餘人各遣使迎淵淵使柴紹將數百騎迎李氏關中羣盜皆請降淵以書慰勞使受世民節制營中號李氏軍曰娘子軍今鄆有陳兵坊村相傳爲李氏散家聚徒衆處

通鑑唐代宗廣德元年冬十二月築城於鄆縣及中渭橋屯兵以備吐蕃以維奉先爲鄆縣築城使遂將其兵

宦者傅帝與元載計除魚朝恩乃使李抱玉節度山南西道又析鄆盤屋等縣以與抱玉朝恩不知爲虞

宋朝奉郎通叛軍府事唐遘捕盜圭峯山內題逍遙棲禪寺詩有捲旆搜山憶盜賊之句

明嘉靖中乾州人樊伸作亂竄入終南山尋討平之

萬歷甲辰回賊倡亂，蓋屋之白龍溝、鄆縣之龐家村，聲勢相應，窟穴其中。鄆令白應輝計擒沙倉等十一人，置於法，而探囊穿窬之盜，尙多。鄆令劉璞爲連環保甲法，每保壯丁二十人，教士一人，每月三日教習，餘日歸農，回亂遂息。見資政錄

麓樵紀聞：叛兵楊國棟擁二千騎，披雙鎧，直抵西安，乞撫。巡撫練國事在鄆縣聞之，馳還，知賊不受撫，必西走。蓋屋密檄沿途設伏，時禾茂泥淖，騎不任馳，伏發，殲其半。賊斬國棟以獻，餘逃入終南山。

崇正甲戌六月，賊混世王八、太王隨、山虎等自鄭安出，從鄆縣至蓋屋，馬召村村民以鄉勇拒之，殺掠甚慘。

麓樵紀聞：朝命豫楚晉蜀兵四道入陝，高迎祥、李自成竄入終南山。十一月，賊自鄆縣至臨城，於南宅堡城門發三矢而去。當是時，賊亂關中有名字者以十數。高迎祥、李自成、羅汝才、黨羽最衆，孫傳庭設方略，親擊迎祥於黑水峪，擒之。李自成襲爲闖王，常出沒於終南山中，鄆當其衝，受害甚慘。一時士夫婦女殉難者甚衆。國朝順治二年，賀負自興安突至，人不知防，城遂陷，遭其害者甚衆。七年至十七

年賊首王才周禹劉四王友權必強王根害祁克贊楊剛白守愛李沙鶴李廣等
先後盤踞南山一帶劫掠村堡焚燒廬舍防將張世美陳福亮勦撫並施根株俱
盡民始獲安

康熙十三年遊擊程福亮聞蜀變自西鄉退兵三河口整鄂兩縣運糧給之明年
八月漢中失守福亮遂退駐黑水谷鄂民猶運糧以給

十六年六月僞總兵王進孝僞副將李成棟等出黑谷屯仙遊寺大掠整鄂一帶
八月總兵王好文至整屋撫賊賊亦以糧盡遁去

嘉慶二年白蓮教匪林齊與其妻王氏作亂自川楚擾至興安漢中一帶又出子
午谷竄至縣境爾時承平日久民不知兵一時受害最慘四鄉劫掠幾空七月初
六日夜賊撲攻縣城有擄至賊中者見城上有騎騾巡閱指揮拒守者賊計不得
施遂去後見中樓上所祀文昌像即指揮拒守之人也遂稟邑令請於七月初七
日設祭酬報至今猶祀之無輟

八年甯陝兵變賊分黨出子午谷攻鄂縣時總兵楊芳赴固原聞變卽帥固原兵

二百人馳救鏖戰終夜身受數創黎明賊知爲芳遂引去以楊芳素得士心也後單騎入營降賊魁蒲大方鄉人比之爲郭汾陽單騎見回紇云

同治元年赭賊洪秀全餘黨郭擺擺由湖北竄至興安一帶出大逆峪至尹家衛由禹王廟入鄂西至丈八寺住紮隨經旗員帶兵逐入甘肅階州文縣等處漢中鎮軍川軍甘軍會勦滅之

二年陝回內訌西鳳同乾同時起事有賊孫思萬者號孫元帥盤踞牛東村一帶逢人卽殺見屋卽燒橫暴幾無人理東漢赤眉屠長安之慘尙不至是十室九空事平村堡幾虛無人焉先是回漢相爭不過如漳泉大姓之械鬪未必叛也西鄉灰渠頭回民村也南四操糾合縣之四鄉村民直搗灰渠頭俗謂劊窠子然烏合之衆人心散渙回自村中出衆爲之辟易賊知鄉民無能執刀亂戮爭相逃走死者甚衆自此鄉民膽怯見賊如羊之遇狼只有受死而已噫慘矣

三年五月初八日髮賊藍二順由湖入陝出子午谷至秦渡鎮假冒官兵入市搶物人始知爲賊時屆農忙驟不及避被害尤甚又有賊藍大順陷盤屋縣盤踞城

鄂縣志 十一
內將軍多隆阿馳軍圍之賊善守半年不下鄂運軍火絡繹不絕鄉民苦之將軍親上礮臺督攻中賊礮子傷目卒於軍諸將見主帥死攻益力賊由西城遁大兵追及藍逆中數鎗遂成擒餘黨悉滅

五年十二月二十日西撚張總愚號小燕王在灞橋敗蕭軍門之兵竄至鄂境南至南山北至渭河號四十萬衆盤据鄂境過年時來撲城晝夜戒嚴至二月初二日始往西竄四月又由渭北竄入鄂境經郭寶昌軍追逐出境

元年至六年回匪髮逆往來蹂躪不絕髮則有曹丕時謝大脚等股回則有馬二元馬化龍等股條忽剽掠人不及避又有兩次叛軍駐紮西坡經彭中軍提道劉中丞蓉勦撫平之村舍寺廟焚燬一空至今幾四十年蕭條猶昔元氣未復哀哉

鄂縣鄉土志中

耆舊錄

昔孟子以友天下之善士爲未足論世知人是爲尙友今居一邑而邑之前賢漠然無聞烏在其能尙友乎表前修而風後進則耆舊之錄所最亟也是編始於北魏而北魏以前則缺焉亦猶錄政績始自漢之意云爾

列傳北魏

周澹

爲人多方術尤善醫藥爲太醫令太宗嘗苦風眩澹治得愈賜爵成德侯神瑞二年京師饑朝議將

遷於鄴周澹與博士祭酒崔浩進計論其不可之意太宗大然之曰惟此二人與朕同意也泰常四年卒

諡曰恭見魏書

唐

殷開山

名嶠以字行世居江南祖不害仕陳陳亡徙京兆遂爲鄠人開山涉獵書史工尺牘爲隋大谷

長高祖兵起從攻西河破衛文昇之兵從秦王討薛舉平仁杲討王世充征劉黑闥卒贈陝東道大行臺

右僕射諡曰節配饗高祖廟廷見唐書列傳今澇峪口內教場相傳爲殷開山操練之處

宋

楊礪 字汝礪建隆中舉進士甲科父喪絕水漿數日服除養母閒居無仕進意鄉舊移書敦勸礪乃赴官歲餘又以母疾棄官後召授隴州防禦推官遷光祿寺丞丁內艱起就職後由員外郎知鄂州以善政聞後累官至樞密副使卒真宗軫悼謂宰相曰礪介直清苦方當任用遽此淪謝即冒雨臨其喪礪僦舍委巷中乘輿不能進步至其第嗟嘆久之

元

賀賁 其先河東隰州人父種德徙關中遂爲鄠人有材略善攻戰數從軍有功關中兵後積屍滿野賁買地金天門外爲大塚收瘞之遠近聞者爭輦屍來葬復以私錢勞之嘗治室於毀垣中得白金七千五百兩謂其妻鄭氏曰語云無故獲千金必有非常之禍時世祖以皇太子受詔征雲南乃持五千兩往獻之世祖即位賜金符總京兆諸軍卒贈雍國公諡貞獻

仁傑 字寬甫賁之子從世祖南征雲南北征乃顏皆著勞績後與董文忠居中事上同志協力知無不言言無不聽多所裨益而言不外泄帝深愛重之一日召仁傑至榻前出白金謂之曰此汝父六盤山所獻者聞汝母來可持以歸養辭不許乃歸白母盡散之宗族帝選民童女充後宮及有司買物多非其土

產山後鹽禁久爲民害皆奏罷之民爲之立祠其妻劉氏沒帝欲爲娶貴族固辭乃娶民間女後喪明夫婦相愛如初未嘗直牒大德九年年七十二請老拜光祿大夫卒封雍國公諡忠貞延祐六年追封奉元王詳見元史列傳

勝 字貞卿一字舉安小字伯顏以小字行仁傑之子嘗從許衡學通經傳大義年十六入宿衛凝重寡言世祖甚器重之大臣有密奏輒屏左右獨留勝許聽出則參乘輿入則侍帷幄非休沐不得至家至元二十四年乃顏叛帝親征勝直武帳中詰旦合戰還侍帝側矢交帳前勝立侍不動一日獵還勝參乘伶人蒙采毳作獅子舞以迎駕象驚奔逸不可制勝投當象前後至者斷鞞縱象乘輿乃安勝退創甚帝親撫之遣尙醫尙食視護拜集賢學士領太史院後屢遷爲大都護及開府儀同三司上柱國及英宗即位鐵木迭兒誣殺之泰定初詔雪其冤追封秦國公諡惠愍至正三年追封涇陽王改諡忠宣子惟一字允中賜蒙古氏名太平官至丞相孫均字公秉後改名也先忽都官至宣政院使俱爲賢相名臣而死于讒譖人皆哀之其事詳具於元史列傳茲不備載

明

崔敬 以進士授太康知縣有遺愛民皆稱之

張賢 字思齊永樂中以舉人授吏部司務遷驗封郎中剛廉自持超拜山西右布政使威惠並流遠近悅服尋乞歸敝廬數楹謹庇風雨一統志稱其廉幹老成

王琰 字廷玉性剛直材貌端凝由貢士爲大甯令大甯民散處山中多翹而負固急則益避匿死弗肯出琰與約令自至爲平其獄訟賦役俾各得所民歡然從之再補長清令吏舞文爲百姓患琰黜老吏三四人其患頓除諸生有段善者家貧無室聘富民女妻之薛文清公行部至其邑品其治行爲山東第一薦爲濟南知府奏未下而卒

馮俊 字子英鄉舉時甫十有八歲旣遊太學會興師乃上書自言能製呂公戰車中貴人召而問焉言頗不遜中貴人怒指爲誑慢落籍爲民旣歸於所居漢水上藝樹竹木花卉相錯如繡因名其地爲錦繡溝旣老猶曰我將才也惜乎世無知之者

王鉉 字大器琰長子少涉經史不與物較閭巷亡賴者酗酒狂罵輒走避以爲常未嘗言人長短鄰子夜入盜麥家人捕之欲送之官鉉訶止之曰不足胡不來告仍以所盜與之其人感化終身不復爲盜其他行事多類此受高年爵卒年八十有一

王彝 由舉人同知解州廉明剛斷百姓呼爲鉄王

王冲 字文會爲諸生時以祖母賀病嘗割股授唐縣主簿督馬政政既克舉民亦無所損

張傑 字世英由祥符教諭累陞重慶府通判性質實剛果在祥符善於其職陳天台督學政甚重之在重慶督餉其先督者多緩懦無爲否則以賄敗傑則剛以集事而自守亦嚴故獨全也後致仕家居卒年八十有八

王儒 字文宗琰之孫體貌豐奇踐仁履義任巴縣教諭誨誘有方科目始盛值誕日伏臘必望鄴再拜曰兒仕爲父母也今栖栖萬里外父母惡在淚下潸然關中大饑人相食乃使弟載脯麵歸養父母餘以及宗族又移宗族可來者三十人於巴里人有來巴者亦予之資使賈以爲活比去巴關中亦稔族黨無死於餓者後調南陽教授克立師道丁憂歸竟不仕冢子翰林院檢討九思被誣誦倅壽州儒賜之書曰古之君子竭忠事主非有所不盡也修身慎行其越人非不多也然往往羅於讒古云引謗莫如自修天地日月巍乎煥然亦求無愧於斯而已又何惑焉卒年七十有五

九思 字敬夫儒之子由進士選翰林院庶吉士授檢討九年滿考值劉瑾亂政翰林悉調部屬歷練政務公獨得吏部閣老李西涯蔭子赴試公以衆人遇之仕路爲之一清京師有向爲真翰林今爲真吏部之名然竟以此得罪會瑾敗西涯諷言官以瑾鄉里劾公降壽州同知既抵任理訟備盜俱有實聲嘗監收

武平衛兌軍糧省耗大半毫民賴以復甦壽近涇湖夏霖二水幾漫其城公文告沉牲雨遂止水落者三尺公以文章厭服海內雖不獲布而施爲亦略見居一年會天變言官鈞瑾餘黨勒致仕公旣歸里舍得終養二親處兄弟極其友愛又率鄉人行家禮修澇河石橋施醫藥育後學垂四十餘年絕口不譚功利事天下想聞風采卒年八十有四著漢陂集續集碧山樂府遊春記詩餘中山狼院本鄠縣志王氏族譜等書行世與李夢陽何仲默康德涵邊延實王子衡徐昌穀齊名海內稱爲宏治七子萬歷初詔建功臣坊於陝西都會公與焉弟九叙字禹夫儒中子自鄉舉後未嘗赴會試隱居自樂以此終身焉九峯自有傳

九峯 字壽夫儒少子由進士授御史巡視居庸開險阻簡行伍利器物時練習衛官怠惰侵漁者必懲主將貪懦者必斥按順天貴戚豪強無敢撓旌廉去貪畿內大治其年秋駕幸居庸諸處率同列諫止前後三十疏不允出爲金華知府明禁令正風俗清獄訟裁冗費四年民大服蘭谿尙書章公 名懋成化丙戌會

元諡文懿

清介素著卒而家貧幼孤九峯爲請疏月給米二石所著有白閣集

張紹芳 字孝先潛心實學且善詩歌人謂有王太史風事父母以孝聞家居四十年片紙不入公門由舉人初仕襄陵高平教諭正身率士不受束修遷沁水知縣介然自守請託不行調五臺築城禦寇修學

育才百姓有張青天之謠比倅順天名譽益著嘗攝府篆庫吏進羨餘三百金叱去次日申呈上司其行事類如此後以疾告歸囊橐蕭然

王語 字仲倫甘貧苦學尤善教誨一時名士多出其門有爲他人弟子而不循規矩者亦必面斥之其人退即改行膺歲薦不仕

魏奉琦 字錦江以明經授隴西訓導隴西士多任俠奉琦裁以禮遂彬彬有鄒魯風遷睢州學正署州篆發兩豪吏奸寘之法州境肅然稱神君後補王傳慨然曰使我碌碌爲富貴何王之門不可曳長裾然吾終不三寸翰從鄒陽枚乘後爲麗詞諧語以博王一日歡遂解綬歸里詩文自娛終其身焉

韓期維 字光宋由進士除知河南新鄭縣抉蠹釐奸聽訟以明斷聞吏白庫盈羨若干金期維秋毫不入己其介凜如也所著有劄錄集五册晴窗綴語二册三益館囊二册于麟絕句解二册藏家

張宏襟 字象南端謹純懿篤於孝友文學尤其所長由進士除知山東萊蕪縣累陞至山西參議提督學政兼按察僉事時癸酉一榜舉領案三十一人衆服識拔之精逆闖入關強公以僞職抵死不受賊亦不加害也躬逢 大清定鼎後優游太平二十餘年乃卒

國朝

程明順 字傑吾少學書未成順治二年自陝西石撫軍拔入標下効力六年從孟制府渡河援晉大捷
黃撫軍疏薦奉 旨除授撫標都司僉事兼署左營遊擊事十一年馬撫軍委勦大犯興安鎮之夏郝等
賊因署總兵事實授遊擊未幾遷參將再遷浙閩督標副將以入海島勦賊功轉河南都督僉事未及赴
任卒

王郝 字子仙自幼敏慧過人由進士授山東文登縣令文登山東巨邑多縉紳喜訴訟公至因俗爲治優
禮衣冠平息爭鬪俸未滿以治行最行取戶部主事歷禮部郎中職滿外轉廣東按察司僉事提督學政
獎拔孤寒釐正文體士氣爲之一振其坊士錄出海內稱大觀焉時兩臺交章薦以葬父歸卒於家

魏惟紫 字青臣以選拔令河南偃師縣時祖母王年已八旬失明本生父母與嗣父母具慶惟紫悉迎
養官署每自擇果脯之美甘手奉祖母而於父母則虔事如一晨昏定省雖公事繁迫得暇即坐祖母側
捧其手摩撫數四娛悅其心後以罣誤歸里遂絕意仕進專以承歡祖母爲事前後凡五經大喪所營棺
槨衣衾及墳墓誌銘無不堪爲鄉邦矜式至於兄惟野弟惟尙則皆厚爲置產而其事兄也則尤不異事
父一味之甘不共不食晚年以兄新葬清明拜掃慟悼不勝遂得疾延十年而卒爲人偉風儀善談論工
書法好學能文邑之大制作多借爲重官雖不顯而品重一時歿之日二曲李徵君題其旌曰孝友先生

焦桐 字蔡音由進士除知浙江昌化縣昌化訟者必納白金三錢名曰壓狀蓋假周禮入鈞金束矢之意以剝民財也桐至卽并一切陋規革之其禁賭甚嚴密然但設法使之知恥而好賭者自息性質直不務赫赫之名遷知泰興縣其治如任昌化時泰興公堂所用架筆及籤筒等物舊以白金爲之每月一易皆里民輪造者其革之自桐始卒後鄉人稱其兩爲縣令家中不增一間屋一畝田可以徵廉矣信哉

王心敬

字爾緝學者稱豐川先生少孤母李氏守孀節鞠育之一言一動必勗以古聖賢成法故先生

自幼遵奉母命年未冠卽斷游觀博奕之好奮然以古人爲程年甫二十五並謝諸生舉業負笈從二曲李徵君中孚講正心誠意之學幾十年仍閉戶探討事親教子不輕一步出門年四十後名聞海內一時黔閩吳楚撫軍咸卑禮厚幣聘主講席先生凡晤對卿大夫必期以致君澤民行義達道遇問學之士必期以成己成物隱居求志絕不隨世依阿所著書有易說十卷江漢書院講義十卷正編二十八卷續編二十三卷外編六卷荒政攷二卷尙書質疑二十四卷詩經說三十卷禮記纂二十四卷春秋原經四十卷又續集五十卷詩草十二卷關學編文獻攬要洗冤錄南行述家禮甯儉編各若干卷曲暢旁通皆本孔孟宗傳爲會歸不蹈後儒門戶偏倚之見至其待人則切切以萬物一體爲懷仁慈公平初無間於親疎遠邇其存心奉身則淡泊兢業蓋自幼至老如一日也康熙雍正間兩次特徵俱以胸塞耳聾實疾固

辭卒年八十有五乾隆甲子陝西巡撫陳公宏謀題請准入鄉賢祠長子功季子勅各有傳

功字建侯性好學凡豐川集中與門人論辨者皆其手錄有侍側紀聞數卷雍正己酉以選拔試用知縣

初試湖南安福僅五閱月請假告歸百姓攀留愛慕稱楚中前此未有之令再試鄆縣潔己愛民實心辦

事令新田著蠶桑成法一書教民樹桑養蠶鄰邑亦爭效之調常甯發奸摘伏人不敢干以私邑中稱爲

冰心鐵面不期月息健訟之風剏書院設膏火樂育人才士民有德政歌丁父憂以哀毀成疾遂卒年僅

五十二爲人廉介和平歷任四邑家無餘資論者謂克紹庭訓云

勅字茂宏天資穎異自少讀書數行俱下又承其父豐川庭訓學有淵源由拔貢試用知縣初試灌陽能

於其職歷任興安全州潯州府太原府黃州府遷江南安徽副使入都卒於京邸爲人孝友丁外內艱廬

墓各三年爲祖父建坊修祠克繼其父豐川顯揚之志事諸昆待諸侄甚篤自登仕籍所在輒有善政去

任時士民莫不攀轅流涕而平日遇事有識有膽在興安甫遷全州尙未離任適值邊苗相仇殺其狀甚

悍同官皆畏意不敢往勅單騎撫之入密箐中荆棘崎嶇沙霧障天苗民持刃相向勅輕衫纓帽坐小廟

中召其渠魁喻以大義彼此帖服羅拜廟前信宿而去至其操守介然有光家學蓋終始如一無愧乃兄

云

張正 字擇中原籍蒲城人年二十餘以家貧廢學鬻紙盤屋聞二曲李先生倡明正學慕之乃北面受業焉後因與豐川徵君往還移家鄆縣平日雖居肆而手不釋卷爲人端方慎密邑士多愛敬之晚年乃手錄其自得語爲就正錄藏於家子慎儀以鄆籍登賢書遂爲鄆人云同時又有魯登闕者字聖居邑處士嘗師事盤屋李中孚先生以古之學者自期待好撫琴著琴譜又著初學規要及會心編籥譜引等書藏於家

張呆 名不傳嘗從學以家貧未試而廢年近三十始娶妻生一子終身居草屋其婦紡績子彈棉爲生從不與鄉里往還即見亦不輕與之言親知問其故則曰渠輩不欲見我我亦不欲見渠渠言非我所欲聞我言亦非渠輩所欲聞相見何爲多言何爲人因號爲張呆呆聞之笑曰我不呆誰當呆者因以張呆自號年五十後每歲自裹糧過盤屋詣二曲先生請教先生必留住數日嘗對二曲曰某不知學但覺人生以此心爲根本人將此心如琢玉使之無瑕如拭几使之無垢便是天地間一箇光明人不然縱多才多能亦算不得真人品二曲亟稱之每舉以勵及門嘗題今人古心四字贈之壽八十餘

焦繩武 字萬年泰興令桐第三子性孤介年十八爲縣學生抵父任僅四月父卒遺囊蕭然泰興士庶以千金爲賻繩武悉却之恐累其父之廉也乃貸於同鄉商人扶柩而歸此後家計愈艱與諸昆弟晝則

力田夜則讀書孝養祖母怡怡綽綽絕無外營繼而授徒家塾以窮經爲要所著有周易參補春秋翼註藏於家

張宋薪 字橫宗榜名又載以避橫渠先生諱故易之好學攻文勤於著述由舉人選授華州學正培士

風重實學不責諸生束修蓋廣文中皎皎者值大計撫軍桂林陳公列入卓異薦云學有淵源卓然師表授項城知縣廉靜慈祥無慚儒吏罣誤歸下帷理舊業不入公庭不履市塵尤爲儒林雅望著述甚夥藏於家現有奈園小草行世

賀從 字吾好天資穎悟研窮經籍尤邃於易登賢書連試禮闈不第仍壹志經學平日寡言笑慎步趨不輕取與不妄交接見者皆禮敬之選授狄道學正大學士桂林陳公知其爲純儒從至狄道謁楊椒山祠慨然有講明正學之思每謂諸生曰先賢可學而至其署河州學正語諸生亦以此諸生多遵信焉乾隆壬申卒於官所著有易經管窺詩文稿又有姚海者邑處士自幼嗜書不以貧累志於周易頗知觀玩殫力數十年著易經體傳四卷王通判又樸爲之序

魏樞 字北曜自少篤於實學事親色養備至與從兄弟友愛甚篤居常下帷以諸生入公門爲深恥教鄉里亦以是爲諄諄乾隆中以歲貢任淳化訓導某監生暮夜投金欲逞憤於某寒士樞即擲其金面責之

由是諸生無敢干以私者而師道立教化行任六年歸年八十卒

李執中 軀幹魁梧天資純篤自幼從師頗通文義以家貧食糧本省督標下由行伍中式武舉選授武功千總歷遷湖北黃州協中軍都司僉事平日嗜周程張朱講學之書每蒞任逢朔望必率弁兵同集公所宣講 聖諭使之身體力行又捐俸爲兵丁子弟延師課讀以有勇知方爲訓於營伍大有振興故歷任之所兵民和輯

賈自公 字應台幼失恃祖母王氏撫之嘗至村塾竊聽書聲塾師范顯基見而異之即令來學夜讀書苦無繼晷資每侍祖母床側暗中溫故有疑字以香火照之弱冠爲縣學生事祖母至孝祖母病在堂值地震不能起祖母遣之出自公泣下俄屋傾半間祖母幸無恙家人急扶去未幾屋之半間未傾者亦傾人以爲孝感所致後登鄉賢書教授鄉里從遊賴以成名者甚衆潼關道楊某慕其文行聘之再三自公以桑梓爲重不就知者稱之

閻登雲 字雨田嘉慶壬戌進士歷任江蘇金匱吳江等縣廉靜慈祥訟清刑簡所至有政聲稱青天焉其最著者如吳江地瀕黃河歲有水患動費十餘萬金公日夜焦灼思一勞永逸之計遂由數百里外收運馬板草數百萬夾堤兩岸用土壅築隄年水復發堤遂無恙永除水患中丞某札飭所屬悉照法辦理

民到于今稱之

閻震軍

侍衛臨關之子登雲從姪也軀幹偉大成豐八年武舉以漢南鐵樓川把總擢署沔右營都司

擒匪猖狂從督師駐軍黃霸驛賊肆擾率勇三十人逐之賊潰追兩日夜至山叉河灣伏賊出圍之血戰十餘合被重傷賊勸以降罵不絕口賊支解而死督師深惋惜焉從弟震澤武生豪俠有胆略同治壬戌回變奉旨各集鄉團邑侯諭令震澤督其事隣村難民皆來依賊突至不及備震澤與其二子合力擊賊殺傷無數卒以衆寡不敵被鎗而死二子殉焉衆譁潰堡城遂陷其妻在虜聞賊至投井而死家人俱被戕賊壯其人以大旂豎震澤門叱衆賊無得毀室事聞學憲扁其門曰一門正氣

張鏡堂

字蓉生成豐庚申進士爲人沉靜詳審好學不倦不以世故嬰其心有暇輒讀書手不釋卷以

進士即用四川知縣比赴任時賊已猖獗公日夜焦思籌禦敵守城之具憂勞成疾回籍遂卒人皆惜之

鑑堂

字海若鏡堂之弟也咸豐戊辰進士河南即用知縣署汜水值水溢爲災辦賑有方民免流離頌聲

四起調署羅山隨補滑縣任滿又署西華固始等縣卒於汴梁省公愛民如子視錢如仇非其義一介不

取好賢禮士堂課之文親爲之修飾潤色決獄如神於無情之訟多寘之不問以故賢者訟其德不肖者

服其化所歷地方頌聲迭作去任之日民扶老攜幼涕泣流連卒之日家無餘資可以徵其廉矣

陳樹楠 字筱園同治辛未進士湖北即用知縣歷署蒲圻通城當陽遠安等縣知縣特授武昌府咸甯縣知縣歷署數邑政平刑簡吏畏其威民懷其惠在咸甯剏修書院捐俸倡湊膏火由是士類爭相磨礪文風丕振建社倉修西河橋養濟院百廢俱興政聲流聞兩臺交章以卓異薦前後三任咸甯士民于西河橋立陳公去思碑

魏鼎晉 字銘三同治庚午舉人文行兼優縣主聘主明道書院講席學規嚴整及門多純謹士初署同州教授訓導與某寒士有隙欲借公革某廩以洩忿持詳文請用印公擲文於地責以大義訓導謀遂寢其公直類如此署漢中府教授士子悅服解組時贈以德媿正學扁額凡邑中修城垣社倉書院諸義舉皆異常出力處鄉黨間好爲人排難解紛公在時數十年同里無構訟者至今人皆稱之

以上諸君子雖學問有淺深事業有隱晦要皆不可以一行概者昔夫子與子貢論士曰行己有恥使於四方不辱君命即次之以宗族稱孝鄉黨稱弟故於列傳後即繼之以孝友傳

孝友

宋

甄婆兒 母劉與同里人董知政忿爭知政擊殺劉氏婆兒始十歲避仇徙居後稍長念母爲知政所殺

方寒食具酒殺詣母墳痛哭歸袖斧往見知政知政方與小兒戲婆兒出其後以斧斫其腦殺之有司上其事太宗嘉其能復母仇特貸焉

明

閻性 廩生幼聰敏事孀母承顏順志甚得歡心母病飲膳湯藥必先嘗而後進衣不解帶者累日及棄養哀毀異常時鳩鵲並巢庭前人謂孝感所致當道以綵幣旌之

王應臻 家甚貧買布爲生以事二親夜常數起問安歲大荒倍力求給一日養不繼潛翦髮造其隣易粟食親已與妻食糟糠里人感服稍調之得濟於厄母亡事繼母亦篤又有拾金還主事督學旌其門且給粟優獎之

張被 父紹芳早卒母王氏在堂被問安視膳未嘗一日離膝下與兄析產拈鬮被得大宅竟讓於兄里中無賴子橫逆相加直受不報自少至老足跡不至公門懼辱親也

騫高第 字雲翥邑庠生性至孝友慷慨好義崇正十三年大饑傾粟賑濟全活者甚衆學憲汪公旌其門曰宏仁高士

國朝

王永圖 字伯固 邑庠生 性純謹 雖盛暑不去衣冠 接人無少長咸敬之 居家孝友 年七旬 每念及二親 輒流涕 待弟姪篤愛 時人推爲先輩典型

王永清 字印武 太學生 以孝友稱 修髯偉幹 崇氣節 遇人急難 輒纓冠救之 事過率不樂人知 所交皆一時賢豪 當事者知其賢 徵辟不就 惟觴詠以自適焉

王先身 邑庠生 少好學 持躬狷介 順治二年 賀賊陷城 奉母閻氏避賊 賊至 挺身護母 與其母俱斃於賊 學使鄆令俱以扁旌其門

王曠 邑庠生 漢陂王太史九思之裔 孀母張氏持齋好施 曠家貧 供母隨母所施 靡有不應 愉色婉容 務以悅親 流賊入城 曠被擄及歸 家母已被殺 一哭而絕 隣人救之 經夕乃甦 泣血三年 時謂之真孝子

陳調陽 邑庠生 性至孝 父樓居會樓 焚調陽突入 火負父出 父子肢體一無所傷 人以爲神助 父卒 調陽僅弱冠 兄調元早逝 遺孤輔聖甫八歲 弟調中甫四歲 事孀母魏氏 先意承志 知母素憐孤孫 幼子一切家產 盡以美者與之 又爲之延師 取友 日夜勸課 皆底成立 督學使者屢擢其優行

陳輔聖 大學生 少孤 依孀母 形影不離 比長 制行純篤 與物無忤 時人方之陳仲弓 母病衣不解帶 藥必親嘗 母一日不食 己即一日不食 母卒 哀毀成疾 未踰年卒

魏維野 字濟川邑庠生修幹美鬚和平淵雅事親色養備至待兩弟甚友愛一飯必共片時不借如失
左右手督學楊公旌其門曰殺身成仁

劉龍州 繼母張氏性嚴急龍州日侍左右略無忤色父卒後事之二十餘年不少衰以明經授教職舉

鄉飲正賓

王忻 徵士心敬父也順治初邑遭寇變賊繫忻母拷索銀幣忻挺身護母賊揮刃中其肩幾殞賊平家業
蕩盡忻力田服賈奉母承歡伯兄慙苦貧忻分己產贍之仲兄慙妻亡遺二子鞠之如己子焉孝友之稱
人無間言乾隆二年奉 旨建坊祀忠孝祠

張玘 父彥俊病瘡醫不能治玘日夜涕泣忽有一道人曰我能治汝父病須人肉爲引奈何玘即持刀割
左股肉一塊和藥父病遂愈

王賢 家貧爲人傭供親衣食未嘗少缺或於親舊家遇有菓肉必懷以遺親親未食不敢先嘗及親卒典
身以葬

王邗 邑庠生父病累藥弗愈邗日夜禱神祈藥一日視父糞白即嘗之對兄弟泣曰父病可憂也越數日
其父果亡

劉零昭 自幼即知承順親志恭讓其兄值歲大荒父歿無以爲斂請於兄欲典身辦喪具親族憐而助之乃克襄事隆冬與兄御車渡豐水零昭勸兄坐車上已獨敲冰入水御車而過脛骨爲冰所傷血流至足兄子思聰成童勸兄令從師讀書思聰遂入庠而已子漸長其兄亦欲令之讀書零昭謂二子皆讀誰躬耕乎竟使己子終身任農事鄉里謂其不學而孝友殆出於至性云

屈乃伸 邑庠生九歲就傅年十三念父營生計於外身受嚴寒即欲棄書改業以代父勞父不許始厲志讀書母閻氏失明十七年承歡孝事始終不渝與弟式好無尤年五十得沉疴不肯聞於父惟戒子弟聚百順以承父歡並詳及其父他日附身附棺之事遂逝邑人公舉孝友王令懷堂爲之建坊題曰孝友坊

閻泰臨 邑庠生弱冠即以孝名父病篤嘗囊心憂每夜禱於天願以身代及歿哀毀骨立廬墓三年事繼母袁氏與親母無異袁氏目已盲泰臨百方調理禱於神者三月一日兩目復明長兄干城有腿疾痛不欲生泰臨跪乞進食奉湯藥遂愈待諸弟友愛終身又推恩本族濟其困窮康熙六十年歲饑捐糧二百石族人賴以存活者頗多

孝友固無不義之行而義行不必以孝友著也一時之慷慨一事之合宜一身一家之庸德可風

一邑者皆可錄也不分士民

義行

明

侯峪

景泰時出麥豆三百石賑荒有司以聞賜勅書獎勵勞以羊酒旌之曰義民

魏綱

家貧孤介不妄取大戶王元飲綱肆中遣官銀二十兩次日不知所亡幾欲自縊綱聞之即出原金

與之封志如故一時傳其高誼邑人有事城隍廟四方捐貲約千金餘出入其手功成無以私疑之者

王振世

字安卿邑庠生萬曆乙巳歲大饑與兄生員輔世輸粟百石濟飢民振世沉靜端凝遇有橫逆

不與之較所著有浪吟草五陵秋古豐八景圖詩

魯潮江

性好施萬曆甲寅歲大饑潮江親詣撫臺請輸己糧賑荒撫臺諭之曰輸三百石乎江少之又

詢曰五百石乎江又少之竟自輸一千石撫臺喜扁其門曰惠濟羣生又有王惟祐劉堰趙守文張惟炳

王藩張篤皆慷慨好義捐貲賑濟於凡修橋建堡皆不惜己貲以爲衆倡是皆可以風世厲俗也

吳大猷

邑庠生明末流寇蜂起率鄉勇拒賊力戰村破被殺時有劉學鑑率鄉兵救援與大猷同死全

調鼎邑庠生闖賊西來領鄉兵堵截格鬪而死張奇英邑庠生拒賊見殺王福邑庠生拒賊見殺王良志

手刃其驍勇者十餘人賊不得入村因刀柄折爲賊所殺劉惇賊至力戰殺賊十餘人救父出復入援村人被賊射死斬之翰邑庠生爲人敦厚重義輕財遇奇荒活人甚衆後因流寇猖獗辱及其身罵詈不絕自縊死

國朝

孫振 字公起邑庠生修髯偉貌凝重寡言闖逆僭號向北流涕自是隱遯不出平生沉酣五經尤好春秋三傳教授生徒務令存理遏欲著邑篆駱公扁其門曰高風絕世同時又有賈應隆字棟伯邑庠生文行兼優將膺歲薦值逆闖之變足跡不入城市居家教授無心進取駱公扁其門曰節義流芳

王圻 邑庠生賀賊陷城圻不少屈以罵賊殺身

張筮 字漢卜邑庠生里人張闡知無辜陷法筮出銀力爲辨冤其人得以不死兄冀故遣子學渠效渠俱幼筮代理其家多方教訓皆底成立順治二年賀賊陷城周令之輔被賊刺傷奸人欲害之筮率族人百餘左右保護至今稱爲義舉

王永嘉 性樂施閭黨有婚喪患難無不調給稱情又嘗焚積券置義塚又有諸生劉必壽歲貢劉昶順治丁酉歲饑里人不能自存必壽借捐己貲賑濟不足又出券轉貸隣邑大家得銀粟計口分給里人得

以全活李發榮重義輕財值歲饑出金粟賑濟全活甚衆

關志仁 性尚義年十四途中拾一銀封即書其事揭於門招人認取數日無認取者乃施原銀於城隍廟繼而收養族姪郁爲之娶妻始令外居及其歿也復出棺材衣衾殯葬焉又出銀三十兩爲族弟天相娶妻又常給衣食其厚待族人概如此鄉人王某與其身於大姓威逼贖身王某不堪其苦欲投澧水死志仁聞而憐之代出價贖歸跡其素行名曰志仁殆無愧云

附名宦祠 其事跡俱見政績錄

漢

何武 字君公蜀郡郫縣人

唐

裴子餘 絳州稷山人 盧奕 黃門監盧懷慎少子

宋

陳希亮 字公弼眉州青神人 程顥 字伯純河南人 張伋 李宗 大梁人

金

劉君 失其名彭城人

元

察的兒

明

許訴 開封人

徐純 字德善豐州人

張億

程鵬 解州人

康天爵 字汝

修 楊祐 內江人

馬呈圖 字道甫蜀內江人

劉璞 字柘山莒州人

張宗

孟 字泗源山西定襄人

吳憲 安邱舉人年甫二十餘以師道自居為諸生改正文字各因其長

成就之又教授尚書由是多以尚書舉者 補傳

周億 孝義人事蹟見前

鄉賢祠 其行實俱見耆舊傳

唐

殷開山 名嶠以字行

宋

楊礪 字汝礪

元

賀仁傑 字寬甫

明

張賢 字思齊

王冲 字文會

王九思 字敬夫

國朝

魏惟紫 字青臣

王心敬 字爾緝

節烈祠 其事備載邑志今但錄其氏其未入祠者姑從缺

元

楊氏 閻楨妻

明

王氏 朱威妻

李氏 高徵妻

國朝

王氏 生員陳調元妻

李氏 王忻妻

戴氏 邑民王收妻

戴氏 邑民王模妻

王氏 邑民劉創業妻 高氏 邑民牛義心妻 張氏 邑民李哲妻 楊氏 曹倫妻

陳氏 邑民張岸妻 譚氏 孫詔妻 劉氏 邑民鶯炯斗妻 張氏 生員魏槩妻

王氏 杜宗韓妻 姬氏 邑民溫葳妻 王氏 魏聲一妻 王氏 陳我愈妻

楊氏 袁福妻 傅氏 生員陳夏聲妻 劉氏 張篔妻 楊氏 郭綉妻 蕭氏

司琮妻 張氏 李培英妻 劉氏 任道遠妻 袁氏 陳爾道妻 魏氏 陳渤妻

童氏 張惟彥妻 傅氏 趙孟實妻 侯氏 馬寵妻 陳氏 張權妻 閻氏 陳

錄妻 王氏 生員陳子典妻 仝氏 儒童任昌宗妻 康氏 霍鳴度妻 山氏

王作仁妻 譚氏 劉方深妻 劉氏 生員穆釋妻 單氏 生員王景著妻 姚氏

韓養基妻 程氏 監生李翰臣妻 嚴氏 仝養氣妻 徐氏 劉唐妻 沈氏 王

國俊妻 童氏 舉人李振年妻 王氏 張守妻 楊氏 李朋妻 程氏 王民諒

妻 騫氏 閻齊妻 張氏 劉學妻 康氏 儒童史廷祥妻 弋氏 趙士貞妻

張氏 孫永烈妻 白氏 段普妻 朱氏 楊芳妻 郭氏 王文才妻 張氏 王京妻

賈氏 生員劉古文妻 郭氏 李學聖妻 范氏 焦文會妻 童氏 韓文煥妻

張氏 焦元沛妻 劉氏 屈含琰妻 王氏 劉禮昭妻 賈氏 傅懷璧妻 劉

氏 屠信妻 高氏 張國祥妻 李氏 姚德顯妻 施氏 賀三仁妻

人類

鄆民灰渠頭舊爲回民所居之地龐家村亦有回民自回匪倡亂多年用兵草薙而禽獮之至今回民絕跡於鄆漢人之外無他族種

戶口

乾嘉以來戶口蕃滋查邑志所載軍民一萬八千三百七十一戶男女大小共一十一萬二千一百四十三口自回匪髮捻倡亂以後戶口寥落所存遺民不過三之一近來 朝廷休養生息略近原額今查刑科冊籍所載戶共一萬六千二百七十口共九萬九千五百一十

氏族 息深者達自塵積厚者流自光積善餘慶古今通義故凡累葉通顯者必其先世嘗有陰德

而世濟其美者也世有爲善欲求速報不得遂輟者觀此可以鑒矣

王氏 其受氏之由支派甚衆有十二望未知其的係何支 其先河南太康人來仕京兆遂家

高陵卒葬其縣東南鳳正原上今有墓十二人稱大使家墳有繼容繼先繼祖者
 元末兵起繼容繼先東行出關繼祖二子克誠克信挈家西走避居鄆縣終南山
 中明興徙居城內北街道東遂爲鄆縣王氏四世琰 由貢生授大甯令又補長清令 五
 世鉉 有隱德見邑志 六世儒 舉人祥符教諭 七世九思 進士翰林院檢討吏部文選司郎中崇
 祀鄉賢 九叙 舉人 九峰 由進士授御史 十二世心敬 理學名儒崇祀鄉賢 十三世功 拔
 貢歷試安福鄆縣新田知縣調補常甯知縣 勅 拔貢歷試灌陽興安遷全州陞授潯州府太原府黃州府
 安徽副使道 十四世師和 拔貢生 十七世夢彌 陣城屯政司 夢燕 舉人 二十世昀 奉
 祀生 菑 奉祀生

景氏 楚公族之後漢武徙豪傑於關中今陝西多此姓 其先富平人祖文顯 順治時自富平遷
 鄆世居縣南街 三世光福 太學生妻王氏勅旌節孝 五世元常 舉人 元春 歲貢 六世和恩
 貢生捐貲賑濟 七世士純 廩生 士端 增生以軍功保薦知縣著有大學晰義防城稿藏於家 士
 超 附生 士燁 廩貢 士俊 候銓州右堂 八世哲 優附生鄉飲介賓

張氏 黃帝之後黃帝第五子青陽生揮爲弓正觀弧星始制弓矢賜姓張氏 其先世無可考始祖

子倉 前明秦愍王府正四品職原籍浙江温州府瑞安縣洪武間隨駕入陝居省城後遷鄆 子倉以

後無譜牒可考至國度之孫士臺勤謹治家樂善好施尊師敬教其家始大 孫鏡堂 咸豐庚

申進士即用四川知縣 鑑堂 進士即用河南知縣 兆巖 舉人候銓知縣

崔氏 齊太公之後太公生丁公伋伋生叔乙讓國居崔因氏焉 始祖瑛 自邑牛東村遷居縣城進士

工部都水司主事改戶部雲南司主事陞本部山東司員外郎 自瑛以後無譜牒可考啓積之子

宏宏之子應蘭應蘭之子玉徵 進士官至內閣中書 玉儀 候銓通判

崔氏 其遷鄆之初無可考世居邑東崔家灣 始祖登岱 邑庠生其家始大 五世世英 邑庠生

鄉飲介賓樸誠純謹教誨有方閣里贈匾額曰絳帳風清 六世生梧 生權 布政司經歷博覽羣籍

性耽吟咏著有紫閣山人未是草 七世志道 同治壬戌進士翰林院編修歷充功臣館 國史館纂修

實錄館總校 日講起居注官廣西鄉試正考官 京察一等 特授四川雅州府知府卓異一次歷署甯

遠嘉定府知府

趙氏 造父之後造父事穆王以功封趙子孫因以為氏 原籍鳳陽府始祖永昌 以侍衛秦府任

左護衛將軍遂家於鄆之定周村 四世魏 妻王氏 勅旌節孝建坊入祠 六世準 綸 雍正間歲

大饑出粟散賑鄉人贈扁額曰恤及鄉鄰九世樹梓增生事繼母魏至孝鄉里稱之十一世元震業農舉人趙繼聲之父

賈氏唐叔虞少子公明封於賈故子孫因以爲氏又云本自周賈伯之後其遷鄆之由無可考明

末始祖應魁爲司吏崇正七年歲大饑出粟賑濟閣操公贈匾額曰義高賑饑應隆明廩生文行

兼優隱居樂善國朝邑令駱公奉旨旌表高士扁其門曰節義流芳六世積中歲貢生候銓訓

導交泰舉人待價拔貢任州判待詔拔貢官教授七世霑附貢生候銓花翎鹽提舉聯榜

拔貢錫智舉人八旂漢教習原任邠州學正含章舉人岐山教諭聯芳舉人大挑一等原任山西

霍州直隸州知州加道銜升用府八世其順歲貢生候銓訓導即舉人賈鳴鳳之父奎歲貢歷署澄

城洛川華州訓導嘉廩貢任南鄭縣訓導敬修拔貢鑫副貢任四川江安知縣

陳氏虞闕父之子封於陳其後遂爲陳氏其遷鄆之時無可考世居縣北街始祖思孝明

隆慶舉人四川太平知縣一世治體孝選知縣三世調元生員妻王氏勅旌節孝奉旨建

坊四世輔聖以例貢補江西安義縣知縣瓚進士即用江西安義縣知縣行取中書六世洪清

水縣訓導十一世樹楷增生髮回之亂辦城防車馬等局蒙縣主保舉候銓訓導樹楠進士湖北

即用知縣 十一世遇順 附貢生 遇道 附生

陳氏其遷鄆之時無可考世居宋村始祖蘭 三世琨 鄉飲正賓 四世守基 鄉飲介

賓 六世以謙 議叙六品 七世煥珽 舉人 煥珪 舉人

王氏 其遷鄆之時無可考稽世居縣北街其先譜牒無傳 主一 邑庠生學問淹通勤於訓誨其家始

大 二世恪 邑庠生鄉飲介賓 三世文衡 邑庠生 四世偉 業農舉人甯津知縣王恆晉之父 五

世恆震 廩貢生甯津知縣王恆晉之兄

宗教

自我孔子以生民未有之聖祖述堯舜憲章文武後世儒者皆尊師焉所謂天不生孔子萬世如長夜也佛教起於天竺東漢時始入中國回教始於天方西北諸夷多從之其族類漸移於中土天主教之昉於猶太復元教之起於日爾曼近來各以其教鳴於口土紛紛矛盾不可究詰今釋道已微不過博取佈施與人唱歌祈禱而已自回匪滋事灰渠頭一帶清真寺盡爲邱墟今已滅迹掃塵無所謂回教者天主教則自咸豐中天津議和法教士駐高陵神甫來鄆傳教而從者尙屬

寥寥自回匪猖獗不殺從教之人由是從者日衆據今日而論天主教人共有六百名口救世教則自近來始賃屋一所以爲演說之區今信從者現有五十名

實業

昔大禹曰德惟善政政在養民而養民之要則曰水火金木土穀惟修而已正德利用厚生惟和而已鄠邑去各埠稍遠亦無工藝之廠故經營工商之業者實屬寥寥然士好讀書農勤稼穡此其可尙也

據今日而論其讀書能文通聖賢立教之旨明中外締交之形者不過千之一讀書識字而通文義者百之一略讀書識字而記姓名者十之二三

鄠邑之民皆以稼穡爲資生之本故凡爲士爲工爲商之家未有不爲農者非若西國之專攻一業以資生也

其作什器以利用者不過五十之一

懋遷有無以阜通財賄者不過五十之一

Blank page with vertical lines.

鄠縣鄉土志下

地理

本境在省治西南五十里外縱一百二十里橫四十里東與長安縣毗連以灃水爲界北與咸陽縣毗連以渭水爲界西北與興平縣毗連以澇水爲界西與盩厔縣毗連以灰渠爲界南與寧陝廳毗連以秦嶺爲界

城高二丈五尺東西一百九十三步南北五百四十步周二千二百三十四步面積一萬零四百二十二方步隍深一丈五尺城門東曰宜春南曰保康西曰通濟北曰望威四門俱有二層樓四楹高三丈餘四隅亦有敵樓各二楹高二丈七尺城中心建文昌閣臺基四面各闊六丈高二丈五尺其上有樓高四丈五尺上下共計高七丈

縣署在東城門內南向臨街大門四楹門內東爲寅賓館北爲土地祠又北儀門四楹內有戒石坊坊北正堂六楹東西爲庫房正堂東轉北爲廡正堂前東爲吏

戶禮倉等房西爲兵刑工等房其南爲獄正堂北爲思補堂又北爲知縣內宅其儀門外東偏爲民班捕班儀門內東偏爲快班二班各廳

城守營在縣署東卽舊主簿宅後改爲明道先生祠旁有明道先生手植雙槐今尙存今爲城守營署

典史廳在縣署正堂西南

東學在典史廳西其西爲明倫堂又西爲西學

明倫堂在文廟北門房二楹正堂六楹內爲崇聖祠樓上爲尊經閣

文廟在東街正中其制南向臨街牌坊四楹高二丈以內有二門東曰賢關西曰聖域兩旁門東曰禮門西曰義路又內爲櫺星門又內爲戟門六楹東爲名宦祠西爲鄉賢祠各四楹戟門內爲東西兩廡各八楹兩廡北上爲大成殿四面皆重簷

張公宗孟祠在文廟西今設警察局於其內

公館在東街北向今改爲里民局

養濟院在東門內南順城巷東向

城隍廟在北街西向內南向廊廡道院殿宇共八十餘楹

火神廟在北街東向房間共二十餘楹

賢母祠祀王心敬之母在北街東向

高等小學堂在西街南向即明道書院所改作者臨街大門房二楹內東西兩廂房各三楹爲門役住宿之所北爲二門兩楹東西號舍各六楹又北爲卷棚講堂各六楹內東西號舍各四楹北上爲吟風弄月樓祀至聖先師孔子及明道程先生神主其下爲管理員校長住宿處講堂後轉東爲東齋號舍東西三排共十八楹其北東西號舍各四楹北上爲春風堂四楹爲正副教員住宿之處東爲體操場節義祠在高等小學堂西偏即節烈祠

關帝廟在節義祠西房間共三十餘楹

二廊廟在南街東向房間共十六楹

永裕倉在縣署後房間共三十餘楹社倉每操各一處

全境分四鄉共區爲十三操大小不等

東鄉凡村堡一百有一內鎮二關外堡七有玉皇樓關帝廟后稷廟三官廟先農

壇籍田四畝九分距城二里曰小豐村東西二堡偏北曰青楊寨有太白廟五里曰兆

豐橋堡 五堡有文王廟文昌祠元武寺 偏北曰郭家寨青楊務 三堡有太白廟 元柳樹堡

周店石佛寺堡 東西二堡 坡頭堡十里曰周貴坊 南北二堡 偏南曰黃家寨索村四

堡有石佛寺 偏北曰吳家寨午周村 東西二堡 索家寨侯家廟堡 有關帝廟 韓奇寨東

西二堡 十五里曰方家寨龐村 南北二堡有唐李靖廟羅漢寺 沙河寨 東西二堡 第五橋

堡 五堡有漢霍光廟 偏南曰喬家庄南沙河寨焦陽村 二堡 崔家灣 東西二堡 偏北

曰辛家庄谷子禮 三堡 待詔村 南北二堡 趙王鎮 東西二堡 秣師坡南奇寺堡顯樂

村文義村二十里曰西留村偏南稻谷庄 南北二堡 付子村黃堆 南北二堡 偏北曰

牛東 南北中三堡有 勳建梁少保敏壯公化鳳之塋 花原頭 四堡 豐十舖 東西二堡 西鄭庄

東界長安 董村 一名海子即周靈囿故址有文王廟一二十七里曰王渭村偏南曰白楊寨霽

霽堡棗林寨 南有莊嚴寺 張良寨禹王廟堡 有夏禹廟前有禹王泉 南城寨三十里曰

秦渡鎮 四堡即豐宮故址有城隍廟至道觀丹陽井鎮北里許有靈臺遺址鎮東北澧水上有小石橋

西北隅有周文王葬枯骨塚俗名孤魂塚 偏南曰宋村 五堡有棲禪寺一名草堂寺即逍遙園乃鳩

摩羅什譯經處 大良村二十五里曰草市村 東接長安境 以上各堡分操六東關外曰

兆豐操又東曰花原操又東曰秦渡操偏南曰新陽操太平操偏北曰文義操

南鄉凡村堡九十有五內鎮一南關堡二有關帝廟風雲雷雨山川各壇距城四

里曰穆家庄 北有長春觀 偏東曰呂公寨八里曰羅什寺堡 南北二堡寺內有淨土樹相

傳爲羅什足臭土所化 偏西北曰搖子頭 有釣魚臺在澇水中 偏東曰南馬營偏東北曰

陳兵坊 相傳爲唐柴紹妻歸別墅散家聚徒衆處 宋家庄麥張寨 有水月菴 下馬營 東西二

堡屯里 東西二堡 雙庄 東西二堡有伍子胥廟 四府里新陽村裴家寨十二里曰辛粟

村 南北二堡有三官廟關帝廟 偏東曰天和村 八堡有圓通寺太白廟 獨庄白虎寺堡 有

白虎寺 安善坊堡 四堡有安善坊 安爾堡沈家營 南北二堡 保峪坊靈山寺堡 有靈山

寺即程明道先生擊佛頂除惑處 余下堡占管營 三堡有太白廟 舊泉坊 南北二堡有青龍寺

淡家寨後寨新寨爐丹村 三堡 鄭村 有清正菴西南即楊狀元墓 姚家河孫姑村草廟

寨十五里曰石井村 舊傳有石井今廢東西二堡有花原寺 偏西曰白雲寺堡有白雲寺熊
家灣栗峪口堡 山坡有明陽寺即漢甘泉宮故址 東澇峪口堡偏東曰方勝村 四堡有漢曲
逆侯陳平墓 站馬堡柿園里 東西二堡 馮官寨阿姑泉堡 有彌陀寺 五庄化羊村 三堡
龐光鎮 三堡有城隍廟 王寨 村西有普明寺 李源寨古家寨焦將村 東西二堡俗傳有焦
贊墓西有雲際寺 高呂渠二府堡 北即重雲寺 杜家庄萬家寨唐旂寨南坡堡葉家寨
大堰口堡官亭營 有長興寺 二十里窩庄下庄上庄 南有大悲寺 偏西北逾澇水曰
七姓庄北曰水磨頭龍家寨 以上各堡分操四南關外曰羅什操偏東曰安善
操又東曰保峪操又東曰化羊操

西鄉凡村堡四十有一 西關堡二有二官樓澇水經其西上有太史橋 明嘉靖壬寅
王太史九思所勦修 橋頭有寺寺西有西河亭距城二里曰西坡 南北二堡 偏北曰河
頭 南北二堡北堡鵲鷓原上有王徵士心敬墓 二里曰陂頭 四堡有周王季陵東嶽廟即秦蕢陽
宮故址東有漢陂石橋自唐以來名人碑記未可殫述北有九女塚相傳即秦二世砮公主處 偏南曰
孫家磴 四堡有王豐川所修二曲書院遺址 五里曰曲抱村 有玉蟾臺 偏北曰亭子頭 有

觀音寺 偏南曰倫公村 四堡 六里曰小寨斑竹園三堡有竹林寺 八里曰索家庄 三

堡 偏南曰石橋寨割爾庄 有巢閣 偏北曰晉侯村 南北二堡相傳即秦伯獲晉侯處 元

王村 三堡 十里曰丈八寺村 南北二堡有丈八寺胡公廟 偏北曰三旗里灰渠頭 接盤

屋界 格家庄十八里曰東八十村雷家寨 以上各堡分操一曰正西操

北鄉凡村堡八十有六內鎮二北關堡一有興國寺北極樓北極宮城西隅有社

稷壇東隅有厲壇太公廟距城二里曰韓村 東西二堡 三里曰六老菴 南北二堡有

王太史九思王副使九峯之墓 五里曰孝義坊東西二堡 偏東曰霽霽村婁村 有婁敬菴婁

敬慕相傳爲漢建信侯修道處 郭村 三堡 偏西曰洪洞菴甯菴堡 東西二堡 留村八里曰

小寨 偏東曰羊村 三堡 石村 偏西曰百付村 南北二堡 中原寺堡奇家寨黃付村

有青龍寺 十里曰崔村 三堡 偏東曰李伯村 三堡 偏西曰趙王村十三里曰陶官

寨 偏東曰許官寨野口村牙道里 三堡 槐道村真花體宜都村 偏西曰禮賢庄 東

西二堡 圪塔頭十五里曰坳河村 東西二堡 偏東曰真守村 三堡 十王村有勝光寺

王守村趙倫村鑿齒村 有道安寺及晉習鑿齒墓 偏西曰復興寨魯家寨澇店鎮 南北

二堡有城隍廟西臨澇水有石橋西北接興平界一十里雙槐堡偏東曰小王店大王鎮東
西二堡有城隍廟吳村偏西曰馮村馬營堡姚村南北二堡有禹王廟三過村相傳即夏禹
舊宅乃三過其門而不入處一十一里曰留南村偏東曰程家灣偏西曰渭曲坊三堡
祁村二堡一二十三里曰定舟村南北二堡偏東曰付村二堡偏西曰元村四堡一
十六里曰龍臺坊偏東曰北宋村二堡西亂庄東接長安界一十八里曰康王村
五堡三十里曰興仁堡以上各堡分操一北關外曰西北操偏東曰正北操

山

鄠之南境皆山也東接長安西接盩厔皆爲終南山其隨地異名之最著者自西
而東爲次列之

終南山 其脈自盩厔而來東亘長安境 白雲山 在縣南羅什操南境與縣治對其下有白雲觀老

子泉 蓮花山 在縣南保峪操南境曲峪內 牛首山 在縣南化羊操南境其東爲天齊廟下有金峯

寺東爲牛心嶺 化羊山 即化羊峪諸山其最高者曰將軍山 圭峯山 在化羊山東與重雲寺南北

相對其形如圭故名又有小圭峯在草堂寺東 雞頭山 在縣東南太平操南境形似雞頭故名 萬花

山 在縣南太平操南境 紫閣峯黃閣峯 俱在縣東南太平操南境太平峪內其形上竦若樓閣然故名 子房山 在紫閣峯東相傳爲張良辟穀處其下有寶林寺

水

鄠邑諸水除渭水自西流入本境外餘皆出於縣南終南山而北流者也今撮其大者列之而川澤陂池附焉

渭水 在縣北三十里自興平縣界流入過西北正北二操北境入咸陽界 澇水 在縣西關外源出縣

南羅什操南境澇峪北流過正西西北二操而入渭 栗水 出縣南羅什操南境栗峪入澇 漢陂水 在

縣西五里其源從丈八寺堡北伏地湧出 呂公河 在縣東關外明萬歷中知縣呂仲信引檀谷水過安

善兆豐二操繞縣東城北折而入澇 扈水 在縣東二十里出終南山扈陽谷中北流過化羊新陽花原

三操入咸陽界 太平河 出縣東太平操南境太平峪北流過新陽文義二操入咸陽界 澧水 在縣

東三十里出長安縣南澧峪西折入境過秦渡鎮城東北流經長安境而入渭 胡公泉 在縣西南丈八

村泉上有胡公廟或曰吳公廟俱無可考溉田千頃其水不竭 白沙泉 在縣西正西操割耳庄 沒豬

泉在縣東南二十里孫姑村 阿姑泉 在縣南安善操南境抱峪山下 冷泉 在縣東保峪操雙庄

水注谿者谷也鄆邑南境皆山其中居民鮮少零星不可以村堡計故以谷誌之以見其大略云

澇峪 在縣西南三十里羅什操南境峪口有教場相傳爲唐殷開山練兵處內有大庄坪八里坪七畝坪犁轅坪苦竹溝殷家坡楊家庄俱土田肥美之區 **栗峪** 在縣南二十里羅什操南境山坡有藥王洞峪內有馬連岔車轅坡石牆溝逃軍庄東西夾溝由峪口至黑龍太王嶺約三十里 **皂峪** 在縣南二十里羅什操南境內有東平溝西平溝山倉廩子房洞兵溝鐵樓溝黃土坡銀洞溝諸地名 **直峪** 在皂峪西山坡有大悲寺新興寺 **抱峪** 在皂峪東有寶泉寺 **檀峪** 在抱峪東有老君菴李靖泉 **曲峪** 在抱峪東內有石灰洞蒿平潭鷓鴣嶺諸地名 **黃柏峪** 在曲峪內有土地嶺絕頂有金山寺 **烏桑峪** 在曲峪內有仙人橋長仙洞 **太平峪** 在曲峪東其西山即圭峯也峪內有長嘯洞藥王洞寄馬庄諸勝蹟峪外有唐太平宮即今真武廟 **神水峪** 在太平峪東內有睡佛洞 **高冠峪** 在神水峪東內有廉士菴峪口有高冠潭飛泉下注謂之瀑布

道路

由縣治東門外東行至省城有二路十里曰周貴坊又十里曰西留村又十里曰

秦渡鎮逾澧水入長安界又由周貴坊分一支十里至西鄭庄又五里至梁家橋
逾澧水入長安界由縣治南門外南行十里曰辛栗村又西南行十里曰東澇峪
口又十里曰教塲又十里曰土嶺又十里曰林兒又十里曰沙嶺子又十里曰龍
王廟又十五里曰秦嶺入甯陝界由縣治西門外西行十里曰灰渠頭入整屋界
由縣治北門外西北行十里曰奇家寨又十里曰澇店逾澇水入興平界由縣治
北門外東北行十里曰東羊村又十里曰大王鎮又五里曰康王村入咸陽界

物產

鄠邑民俗簡陋耕穡而外別無所長於畜牧種植均未講求新法而工藝尤不能推陳出新非
特物產未臻蕃盛一切製造皆拘守故常雖鄠稱陸海終不免貨棄於地之譏良可慨已

動物則有馬牛騾驢羊豕犬兔以上皆常產 虎豹鹿麝狼熊狐貉猿猴 以上皆特產
雞鴨鵝 以上常產 山雞野鴨鶴鷺鷩鷯鸚鵡黃鸝布穀 以上皆特產 釀蜜之蜂吐絲之
蠶魚蝦螺鱉鼈蛙 以上皆常產 漢陂之鱖 見蘇東坡漢陂魚詩 澇之飛魚 見山海經狀似
鮎可以療痔漏疾鮎明一統志作鮎二物特產

論曰園圃陂池鄠杜固有之利今概棄而弗講惟於飼蠶皆視爲應勤之本務是固周室夫耕婦蠶之遺

俗尙有存者班固謂澧鎬之民有先王遺風信然

植物則有麥 大小二種 青稞稻 稭稷二種 菽 俗謂之豆有豌豆小豆黃豆白豆綠豆黑豆數種
梁黍玉黍 俗名包穀 稷薑芋 顏師古曰芋葉似荷而長不圓其根可食有白者亦有紫者一名蹲鴟
紅薯 此種係桂林陳公所遺者 棉麻桑榆柳楊 有黃白青三種 松柏椅桐梓漆 出南山文
楸 以上皆常產 白骨松油柏 特產俱出南山 木竹墨竹斑竹 俱常產 紫竹 特產 胡桃
蘋果石榴海榴杏桃柿李梨 有數種 栗 以上皆常產 銀杏 特產 百合山藥薇蕨 俱
出南山 蓮藕瓜 有數種 竹筍窩筍葱韭蒜辣 以上皆常產 茭白 特產 烏藥藍 常產俱
大宗 紅花 特產 升麻鬼草 二藥出牛首山鬼草葉如葵赤莖秀如禾服之使人不憂 香附白芷
半夏澤瀉薯蕷地黃茱萸蒼朮南星野黨 出南山 紫蘇 出阿姑泉者佳 天麻 以上皆
常產 牡丹芍藥繡毬玉蘭 今玉蟾臺有一大株 紫薇海棠黃桂丹桂凌霄辛萸菊蓮梅
有數種 紫荊白荊萱草唐棣 以上皆常產 蘭蕙 二種出南山特產 葛茶

論曰澧鎬之間疆爲土膏五穀美種而外其地最宜樹木蔬果花卉之類南山一帶今已若彼濯濯使有
周官山虞之禁令則材木不可勝用也

鑛物則有金銀鑛銅鐵鑛 二鑛在澇峪內樺梨灣 煤礦 在澇峪內石轍溝

論曰東方朔諫除上林苑疏南山出玉石金銀銅鐵異物之類不可勝原鄆屬之鑛當亦不少特民智未開不諳鑛學只得聽其封閉澇峪煤礦光緒八年紳民集股開採旋以山路不便轉運中止繼經 上憲委員修理運路奈炭色不佳銷路不暢徒費千金終無成效惜哉

動物製造則有鞣皮瓣皮繩碾毛氈織毛帶縲絲灌羊油燭羅底蜂蜜

論曰鄆民手工均未甚良僅有皮工數家而治骨角者猶難其人縲絲又半恃女工所有羊毛牛皮蠶繭等物多被省商購去製成熟貨轉售於我則利權外溢豈非一大缺點哉

植物製造則有牀榻棹椅木箱木匣竹簾竹籃雨笠以竹爲之襯以樺皮竹篩掃帚火紙柏油枋塊木耳錠藕粉木炭燒酒黃酒油棉布麻鞋麻繩葛鞋

論曰鄆之植物惟棉花爲一大宗而紡織全恃人工若代以機器則費省價廉布之精細自足以抵制洋布然而難矣

鑛物製造則有鋼南山內有製鋼廠石灰澇峪栗峪化羊峪所出

論曰南山金銀銅鐵各鑛尙未開採所製之鋼實在鄆屬開廠石灰一項本地自然之利亦礦類也故

附志之

商務

鄠地褊小兼非衝要之區外而五鎮內而縣城皆鮮巨商會萃道咸間城內街市尙稱繁盛兵

燹之餘市井蕭索至今元氣未復惟秦鎮各商尙有起色每年銷數向無定額今姑就大概情

形言之

食品薑種者最夥經久不壞由陸路運至乾鳳甘肅每年約銷四五十萬斤本境約銷

十萬斤芋

有紅白二種紅即紅薯白者俗名芋頭

由陸路運至省城咸陽涇原郿武每年

約銷六百萬斤本境約銷二百萬斤烏藥由陸路運至乾鳳興漢甘肅水運至山

西每年約銷五六十萬斤本境約銷二十萬斤胡桃

出南山發售以斗石計以人力馬

力運至省城咸陽涇原郿武臨渭每年約銷五六萬石本境約銷一二萬石百合

木耳

出南山

由陸路運至省城每年各銷三四千斤本境各銷千餘斤竹筍茭白

由陸路運至省城每年各銷二萬餘斤本境各銷五六千斤藕粉所製真粉色味俱佳

僞貨甚多

由陸路運至甘肅四川水運至山西河南每年約銷二十萬包每包天平秤

十四兩本境銷四五千包黃酒

縣內有酒館三四家每製酒一甕用米七斗清爲酒濁爲醅不能

遠行本境每年約銷二三百甕燒酒 本境亦有製者 每年約銷十餘萬斤由鳳翔及醴泉陸運至鄆每年約銷十餘萬斤鹽由山西潞州水運至河口由河口經渭陸運至省城以至於鄆每年約銷三十萬斤榆由山西聞喜水運至河口經渭陸運至鄆每年約銷六萬斤棗由同州府陸運至鄆每年約銷七萬斤水烟由蘭州陸運至省城由省城運鄆每年約銷四五百斤蜜 出南山者最多 由人力運至省城咸陽興平等處每年約銷二三百桶本境約銷二三十桶

論曰藕粉爲鄆地製造之極品且係行遠一大宗乃奸商希圖取利攪以雜粉以致貨失其真名譽頻減亦恨事也

用物繭由陸運至省城每年約銷四五千斤本境銷七八百斤牛羊皮由陸運至省城每年約銷千餘張本境約銷二三百張羊毛由陸運至省城每年約銷六七百斤本境約銷二三百斤絲由陸運至省城每年約銷四五百斤本境約銷二百斤火紙 廠設澇峪內之八里坪七畝坪發賣以摺計 由陸運至省城咸陽醴泉乾鳳郡武等處每年約銷六七百捆本境約銷一二百捆 每捆五十餘斤八千張 松柏枋塊 廠設澇

峪內俗謂之做廂 由澇水運至咸陽分路陸路運至甘肅水路運至山西每年約銷
七八百副本境約銷三四百副石灰 澇峪栗峪化羊峪皆有審灰色甲於各縣 由陸運至
省城整武咸渭等處每年約銷六七十萬斤本境約銷十萬斤漆 南山漆樹最多土人
割取其汁盛以木桶每桶七八十斤不等 由陸運至省城由省城運至乾鳳同朝等處每
年約銷七八千桶本境約銷五六百桶 藍所製出邑之東南鄉者佳 由陸運至省城
咸陽整屋乾鳳等處每年約銷八九十萬斤本境約銷十八九萬斤柏泥 水磨頭一
帶製 由陸運至省城咸陽等處每年約銷二三十萬塊本境銷二二三萬塊木炭 出
南山各峪內 由陸運至省城咸陽涇原等處每年約銷四五百萬斤本境約銷五六
十萬斤掃帚 出南山 由陸運至長安咸陽等處每年約銷六七百萬把本境銷一
二十萬把雨帽由陸運至咸陽扶風等處每年約銷六七十萬頂本境銷五六萬
頂竹篩竹籠由陸路運至省城咸陽等處每年約銷七八萬箇本境約銷一二萬
箇麻 本地出產自用約萬斤 由富平鳳翔陸運至鄂每年約銷二十餘萬斤菜油 本地
製油者不純用菜子雜以棉子鶯粟子名曰雜油在本境行銷歲約五六萬斤 由渭河北興平醴泉

等處陸路運至鄂每年約銷十餘萬斤洋布洋斜由省城陸運至鄂每年約銷二三千疋草帽由渭南陸運至鄂每年約銷七八萬頂木箱竹箱木匣及小兒玩器以人力運至咸陽涇原等處每年銷數無定大約值錢二三千串

論曰南山材木近已刊伐殆盡做廂者寥寥數家火紙廠爲自來火所隔幾乎閉歇咸同之間木坊每年銷三四千副火紙銷三四千捆今之銷數不及其半貿易之衰大都類此

鐵磁鐵貨 如鐵釘鐵鎖之類除自製外 由山西澤州潞安等府水運至河口由河口陸運至鄂每年共銷六七萬斤鏵鏵土由山西河津樊村鎮水運至咸陽由咸陽陸運至鄂每年共銷十餘萬葉鏵刃由省城陸運至鄂每年約銷七八萬張磁器 如盆甕碗罐等物俱曰磁器以馱計 用騾馬力由耀州運至鄂每年約銷一千馱石炭由山西水運至咸陽由咸陽陸運至鄂每年約銷四五萬斤鐵鍋由山西運來每年約銷五百口

以上各門凡縣志所不載類由採訪而得其地理與邑志間有異者則由古今形勢之變遷或由邑志攷之未詳今更正之非臆說也